

## Во Святыи и Великий Четверток вечера

во светильничное, клеплет во 8 час (во 2-м часу дня – А.Р.), и благословившу архиерею, или священнику, начинаем Вечерню: Приидите поклонимся: и предначинательный псалом. Бывает ектения от священника. Таже, Господи воззвах, на глас 2, поставляем стихов 10. Священник же изменяя священническую одежду, исходит, и кадит, и по еже возвратится, творит проскомидию. Мы же поем стихиры самогласны дне, глас 2, повторяюще я.

1. Изведи из темницы дýшу мою, / исповедатися имене Твоему.

2. Мене ждут праведницы, / дондеже воздаси мне.

Стекается прочее соборище иудейское, / да Содетеля и Зиждителя всяческих Пилату предаст: / о беззаконных, о неверных! / Яко грядущаго судити живым и мертвым, на суд готовят: / исцеляющаго страсти, ко страстем уготовляют. // Господи долготерпеливе, велия Твоя милость, слава Тебе.

3. Из глубины воззвах к Тебе, Господи, / Господи, услыши глас мой.

4. Да будут уши Твои / внимлюще гласу моления моего.

Иуда беззаконный, Господи, / омочивый на Вечери руку в солиле с Тобóю, / простре к беззаконным руце прияти сребреники, / и мира умысливый цену, / Тебе Безценнаго не убоясь продати: / нóзе прострый во еже умыти, / Владыку облобыза льстивно, / во еже предати беззаконным: / лика же апостольскаго отвэргся, / и тридесять поверг сребреники, / Твоего тридневнаго воскресения не веде, // имже помилуй нас.

5. Аще беззакония назриши, Господи, Господи, кто постоит; / яко у Тебе очищение есть.

6. Имене ради Твоего потерпех Тя, Господи, потерпе душа моя в слово Твое, / упова душа моя на Господа.

Иуда предатель льстив сый, / льстивным лобзанием предаде Спаса Господа, и Владыку всéх, / яко раба продаде иудеом: / яко овча на заколение, / тако последоваше Агнец Бóжий, // Сын Отчий, един Многомилостивый.

7. От стражи утренния до нощи, от стражи утренния, / да уповае Израиль на Господа.

8. Яко у Господа милость и многое у Него избавление: / и Той избавит Израиля от всех беззаконий его.

**Иуда раб и льстец, / ученик и наветник, / друг и диавол от дел явися: / последоваше бо Учителю, / и на Него поучашеся преданию, глаголаше в себе: / предам Того, и приобретащу собранная имения, / искаше же и миру продану быти, / и Иисуса лестию яти. / Отдаде целование, предаде Христа: / и яко овча на заколение, // сице последоваше един Благоутробный и Человеколюбец.**

**9. Хвалите господа вси языцы, / похвалите его вси людие.**

**10. Яко утвердися милость Его на нас, / и истина Господня пребывает во век.**

**Егоже проповеда Агнца Исая, / грядет на заколение вольное, / и плещи дает на раны, / ланиты на заушения, / лица же не отврати от срамоты заплеваний, / смертью же безобразною осуждается. / Вся Безгрешный волею приемлет, // да всем дарует из мертвых воскресение.**

**Слава, и ныне, глас 6:**

**Рождение ехиднов воистинну Иуда, / ядших манну в пустыни, / и рощущих на Питателя: / еще бо брашну сушу во устех их, / клеветяху на Бога неблагодарнии: / и сей злочестивый Небесный Хлеб / во устех носяй, на Спаса предательство содела. / О нрава несытнаго, и дерзости безчеловечныя! / Питающего продает, и Егоже любляше Владыку, предаше на смерть: / воистинну онех сын беззаконный, / и с ними пагубу наследова. / Но пощади Господи, души наша от такового безчеловечества, // Едине в долготерпении неизреченный.**

**Вход со Евангелием. Свете тихий:**

**Прокимен, глас 1: Изми мя Господи, от человека лукава, / от мужа неправедна избави мя. Стих: Иже помыслиша неправду в сердце весь день.**

**Исхода чтение. [Глава 19, ст. 10 – 19]: Рече Господь Моисею: сошед засвидетельствуй людем, и очисти я днесь и утре: и да исперут ризы. И да будут готовы в день третий: в третий бо день снидет Господь на гору Синайскую, пред всеми людьми. И устройши люди окрест, глаголя: внимлите себе не восходити на гору, и ничимже коснуться ея: всяк прикоснувшийся горе, смертью умрет. Не коснется ей рука, камением бо побьется, или стрелою устрелится, аще скот, аще человек, не будет жив: егда же гласи и трубы и облак отыдет от горы, сии въздут на гору. Сниде же Моисей с горы к людем, и освяти я: и испраша ризы своя. И рече людем: будьте готовы, три дни не входите к женам. Бысть же в третий день бывшу ко утру, и быша гласи и молния, и облак мрачен на горе Синайстей, глас трубный глашаше зело: и**

убояшася вси людие иже в полце. Изведе же Моисей люди во сретение Богу из полка, и сташа под горою. Гора же Синайская дымяшеся вся, схождения ради Божия на ню во огни: и восхождаше дым, яко дым пещный: и ужасошася вси людие зело. Быша же гласи трубнии происходяще крепцы зело. Моисей глаголаше, Бог же отвещаваше ему гласом.

**Прокимен, глас 7: Изми мя от враг моих Бóже, / и от встающих на мя избави мя. Стих: Избави мя от делающих беззаконие.**

**Иова чтение. [Глава 38, ст. 1 – 23: гл. 42, ст. 1 – 5]: Рече Господь Иову сквозе бурю и облаки: Кто сей скрываяй от Мене совет, содержай же глаголы в сердце, Мене же ли мнится утаити? Препояши яко муж чресла твоя: вопрошу же тя, ты же Ми отвещай. Где был еси егда основах землю? Возвести Ми, аще веси разум? Кто положи меры ея, аще веси? Или кто наведый вервь на ню? На чемже столпи ея утверждени суть? Кто же есть положивый камень краеугольный на ней? Егда [сотворены] быша звезды, восхвалиша Мя гласом велиим вси ангели Мои. Заградих же море враты, егда изливашеся из чрева матере своя исходящее. Положих же ему облак во одеяние, мглою же пових е: И положих ему пределы, обложив затворы и врата. Рех же ему: до сего дойдеси и не прейдеси, но в тебе сокрушатся волны твоя. Или при тебе составих свет утренний? Денница же весть чин свой, ятися крил земли, оттрясти нечестивыя от нея. Или ты брение взял от земли, создал еси животно, и глаголиваго сего посадил еси на земли? Отъял же ли еси от нечестивых свет? Мышцу же гордых сокрушил ли еси? Пришел же ли еси на источники моря? В следах же бездны ходил ли еси? Отверзаются же ли тебе страхом врата смертная? Вратницы же адовы видевшие тя убояшася ли? Навыкл же ли еси широты поднебесныя, повеждь убо Ми, колика есть, В коей же земли вселяется свет? Тьме же кое есть место? Аще убо введеси Мя в пределы их, аще же ли и веси стези их? Вем убо яко тогда рожден еси, число же лет твоих много. Пришел же ли еси в сокровища снежная, и сокровища градная видел ли еси? Подлежат же ли тебе в час врагов в день браней и рати? Отвещав же Иов, рече ко Господу: Вем яко вся можеши, невозможно же Тебе ничтоже. Кто есть таяй от Тебе совет? Щадяй же словеса, и от Тебе мнится утаити? Кто же возвестит ми, ихже не ведех, велия и дивная, ихже не знах? Послушай же мене Господи, да и аз возглаголю: вопрошу же Тя, Ты же мя научи. Слухом убо уха слышах Тя первее, ныне же око мое виде Тя.**

**Пророчества Исаиина чтение. [Глава 8, ст. 4 – 11]: Господь дает мне язык научения, еже разумети, егда подобает рещи слово: положи мя утро утро, приложи ми ухо, еже слышати. И наказание Господне отверзает уши мои, аз же не противлюся, ни противоглаголю. Плещи мои вдах на раны, и ланите мои на заушения, лица же моего не отвратих от студа заплеваний. И Господь Господь помощник ми бысть: сего ради не усрамихся, но положих лице свое**

аки твердый камень, и разумех, яко не постыждуся. Зане приближается оправдавый мя: кто прайся со мною? да сопротивостанет мне купно: и кто судяйся со мною: да приблизится ко мне. Се Господь Господь поможет ми: кто озлобит мя? се вси вы, яко риза обетшаете, и яко молие изъяст вы. Кто в вас бояйся Господа? да послушает гласа отрока Его: ходящий во тьме, и несть им света, надейтесь на имя Господне, и утвердитесь о Бозе. Се вси вы огонь раждизаете, и укрепляете пламень: ходите светом огня вашего, и пламенем, егоже разжегосте: мене ради быша сия вам, в печали успнете.

**Таже, ектения малая. Трисвятое.**

**Прокимен Апостола, глас 7: Князи людстии собрашася вкупе/ на Господа и на Христа Его.**

**Стих: Вскую шаташася языцы, и людие поучишася тщетным.**

**Апостол к Коринфяном, зачало 149. [1 Кор. 11, 23 – 32.]**

**Аллилуиа, глас 6: Блажен разумевай на нища и убога, в день лют избавит его Господь. Стих: Врази мои реша мне злая: когда умрет и погибнет имя его?**

**Стих: Ядый хлебы Моя, возвеличи на Мя запинание.**

**Евангелие от Матфеа, зачало 107 [Мф. 26, 1 – 20]; от Иоанна, зачало 44 [Ин. 13, 3 – 17]; от Матфеа, зачало 108 от полу [Мф. 26, 21 – 39]; от Луки, зачало 109 [Лк. 22, 43 – 45]; от Матфеа, зачало 108 [Мф. 26, 40 – 27, 2].**

**И по чину Божественная Литургия Великаго Василиа.**

**Вместо же Херувимския песни поем тропарь сей, на глас 6, трижды.**

**Вечери Твоя Тайныя днесь, Сыне Божий, причастника мя прими: не бо врагом Твоим тайну повем, ни лобзания Ти дам яко Иуда, но яко разбойник исповедаю Тя: помяни мя Господи во Царствии Твоем.**

**Тойже и причастен, и вместо, Да исполнятся уста наша тойже поем множицею, дондеже причастятся братия Божественных Таин. По заамвонной же молитве бывает умовение, и его последование, якоже являет Устав. Таже дается антидор, и отпуст. На трапезе же причащаемся вина и елеа.**